

आकाशवाणी

खास-खास खबरां:-

1. गृहमंत्री अमित शाह होंरें बाहरले मुल्खें थमां गैर-कनूनी तौर पर आए दे विदेशी नागरिकें गी वापस उन्दे मुल्ख भेजने प्रति सरकार दी वचनबद्धता जाहिर कीती।
2. राश्ट्रीय सुरक्षा सलाहकार अजीत डोबाल होंरें आतंकवाद खिलाफ नतीजाकुन कारवाई पर जोर पाया।
3. बी.जे.पी. नै पंजाब- हरियाणा- दिल्ली ते त्रिपुरा आस्तै नमें पार्टी अध्यक्ष नियुक्त कीते।
4. पच्छिम बंगाल च बने दे हालात दे चलदे एअय इंडिया नै जुलाई तगर इज़रायल आस्तै अपनी डोआरिएं दे निलंबन आहली सीमा बदाई दिती ऐ।
5. आई.पी.एल. क्रिकेट दे दुए Qualifier च गुजरात टाईटन्स ते राजस्थान रॉयल्स दा मुकाबला होग। एह मैच महाराजा यादविंद सिंह अंतराश्ट्रीय क्रिकेट स्टेडियम च अज्ज न्यू चंडीगढ़ च होग।



Amit Shah -Gujarat

केंद्री गृह ते सहकारिता मंत्री अमित शाह होंरें मुल्ख च गैर कनूनी तौर पर रवा'रदे विदेशी नागरिकें दी पंछान करिए उनें गी वापस भेजने प्रति सरकार दी बचनबद्धता फही दोहराई। गांधी नगर लोकसभा हल्के च 340 करोड़ रपे दे विकास कम्में दा नीह पत्थर रक्खने ते उद्घाटन करने मगरा उनें एह गल्ल आक्खी। शाह होंरें आखेआ जे सरकार बन्ने दी राखी हिफाजत प्रति बचनबद्ध ऐ। अपने संबोधन च गृह मंत्री होंरें

पच्छम बंगाल सरकार आसेआ इक हफ्ते दे अंदर-अंदर 600 हैक्टर जमीन सीमा सुरक्षा बल गी मुंतकिल करने लेई उनें गी मुबारकबाद दिती।

<><><><><><>

HM -Common Wealth Games

केन्द्रीय गृह मंत्री अमित शाह होरें कल अहमदाबाद च प्रस्तावित कॉमन्वेल्थ खेड्ठ ते ओलम्पिक दी तयारिएं दी समीक्षा कीती। बैठक च केन्द्रीय खेड्ठ मंत्री मनसुख मांडविया- गुजरात दे मुखमंत्री भूपेन्द्र पटेल ते वरिष्ठ अधिकारी मौजूद हे। अमित शाह होरें आखेआ जे मोदी सरकार मुख्य च विश्व स्तरीय खेड्ठ ढांचा ते भलेआ अज्जै-कल्लै दी सिखलाई सुविधाएं दा विस्तार करा रदी ऐ। उनें आखेआ जे अहमदाबाद च अंतराष्ट्रीय मानके मूजब खेड्ठ सुविधाएं गी विकसित कीता जा'रदा ऐ। अहमदाबाद बरे 2030 च कॉमन्वेल्थ खेड्ठें दी मेजबानी करोग ते 2036 ओलम्पिक आस्तै बी अधिकारिक बोली पेश करी चुके दा ऐ।

<><><><><><>

Amit Shah-Bhuj Visit

केन्द्रीय मंत्री अमित शाह होर अज्ज अपने गुजरात दौरै दे दुए दिन कच्छ दे अंतराष्ट्रीय बन्ने कन्नै लग्गदे हरामी नाला ते खाड़ी क्षेत्रें दा दौरा करगंन। एह क्षेत्र सामरिक नजरिए कन्नै बड़ा मता संवेदनशील मन्नेआ जंदा ऐ। दौरै दौरान गृहमंत्री अमित शाह सीमा सुरक्षा बल दे सुरक्षा इंतजामें दी समीक्षा करडन ते वरिष्ठ अधिकारिएं दे कन्नै सीमा सुरक्षा कन्नै जुड़ी दी चुनौतिएं पर चर्चा करडन। अमित शाह सीमा चौकी G-7 दा उदघाटन करडन ते BSF दे जोआनें कन्नै मलाटी करडन। ओह OP

Tower -1170 स्थित नियंत्रण कक्ष दा बी निरिक्षण करडन। एदे इलावा जेटी प्वाइंट पर बुहटे लाने दा कार्यक्रम आयोजित कीता जाहग। दिनें दे खीरै च गृहमंत्री भुज स्थित BSF सैक्टर मुख्यालय च सीमा कन्नै जुड़े दे मुद्दे पर उच्च स्तरीय बैठक दी अध्यक्षता करडन। एह अमित शाह हुंदा पिच्छले 6 महीने च कच्छ दा दुआ दौरा ऐ। एदे थमां पैहले ओह पिच्छले बरे नवम्बर च BSF दे स्थापना दिवस समारोह च शामिल होए हे।



Doval -Russia

रुस च आयोजित अंतराष्ट्रीय सुरक्षा मंच गी सम्बोधित करदे होई राष्ट्रीय सुरक्षा सलाहकार अजीत डोभाल होरें आतंकवाद खिलाफ फैसलाकुन कारवाई दी जरूरता पर जोर पाया। उ'नें आखेआ जे आतंकवाद खिलाफ लड़ाई च दौहरे मापदंड नैई अपनाएं जाई सकदे। माँस्को च आयोजित इस बैठक च डोभाल होरें आखेआ जे जिम्मेदार मुल्खें गी एह तय करना होना जे ओह आतंकवाद गी बढ़ावा देने आहलें दा साथ देगंन जां उन्दे खिलाफ सख्त कारवाई करडन। उ'नें दुए विश्व युद्ध मगरा बनी दी वैश्विक संस्थाएं च सुधार दा विशे बी पुट्टेआ। डोभाल होरें पच्छम एशिया दी स्थिति दा जिक्र करदे होई होर्मुज जल डमरु ते लाल सागर जनेह अंतराष्ट्रीय समुन्द्री रस्ते च व्यापक सुरक्षित ते निर्विघ्न आवा-जाई यकीनी बनाने पर जोर पाया।



BJP- Appointment

भाजपा ने पंजाब- हरियाणा- दिल्ली ते त्रिपुरा लेई नमें पार्टी अध्यक्ष नियुक्त कीते। भाजपा दे राष्ट्री अध्यक्ष नितिन नबीन होरें पूर्वी दिल्ली दे सांसद ते केन्द्री मंत्री हर्ष मल्होत्रा गी पार्टी दी दिल्ली इकाई दा अध्यक्ष नियुक्त कीता। डाक्टर अर्चना गुप्ता गी हरियाणा भाजपा प्रधान- केवल सिंह ढिलोन गी पंजाब भाजपा दा नमां अध्यक्ष ते अभिषेक देब्रोय गी त्रिपुरा भाजपा दा अध्यक्ष नियुक्त कीता गेआ। इनें नियुक्तियें दे कन्नै-कन्नै गै श्री नबीन होरें राष्ट्री स्तर पर बी पदाधिकारियें दी नमीं टीम चुनने दी प्रक्रिया शुरु करी दिती ऐ।



PM -Tribal

प्रधानमंत्री नरेन्द्र मोदी होरें कल नमीं दिल्ली च Tribal Security Forum दे नुमायंदें कन्नै मुलाकात कीती। अपने सोशल मीडिया पोस्ट च श्री मोदी होरें आखेआ जे कबायली समुदाय लेई Tribal Security Forum समर्पण भाव सच्चै गै सराहने जोग ऐ। उनें दस्सेआ जे इस बैठक दरान कबायली समुदाय दे विकास ते उन्दे सशक्तिकरण कन्नै जुड़े दे बक्ख-बक्ख विशें पर सार्थक चर्चा कीती गई।



VP- Visit

उपराश्ट्रपति सी.पी. राधा कृष्णन होर अज्जै थमां कर्नाटक गोवा ते केरलम दे त्रै दिने दे दौरे पर रौहगंन। अज्ज ओह बेंगलुरु च आर्ट ऑफ लिविंग फाउंडेशन दे 45 बरे पूरे होने दे मौके पर आयोजित वैश्विक समारोह च शामिल होडन। एदे मगरा ओह

(दावणगेरे च University) बी डी.टी. कालेज ऑफ इंजीनियरिंग दे प्लेटिनम जबली समारोह च हिस्सा लैगंन। कल राधा कृष्णन होर पणजी च गोवा राज्य स्थापना दिवस समारोह च शामिल होगंन ते CSIR राष्ट्रीय समुन्द्र विज्ञान संस्थान दा दौरा बी करडन। ऐतवारें ओह कर्नाटक दे वेल्थागड़ी च औद्योगिक पार्क दा उदघाटन करगंन ते श्री क्षेत्र धर्मस्थल मंत्रुनाथ स्वामी मंदर जागंन।



Air India –Israel

पच्छम बंगाल च जारी भू-राजनीतिक यक्को-तक्की दे चलदे Air India नै जुलाई दे खीरै तगर इजरायल आस्तै अपनी डोआरियें दी निलंबन सीमा बधाई दिता ऐ। एदे थमां पैहले एयर लाईन नै जून दे खीरै च तेल अवीव-दिल्ली हवाई अड्डे आहले रस्ते पर डोआरिएं गी नैई चलाने दा फैसला कीता हा। एयर इंडिया दे इक वरिष्ठ अधिकारी नै दस्सेआ जे क्षेत्र दी मौजूदा स्थिति गी दिक्खदे होई एह फैसला लैता गेआ ऐ। पच्छम एशिया संघर्ष करी एयर लाइन्स गी महंगे ईंधन ते हवाई क्षेत्र प्रतिबंधे जनेई चुनौतियें दा सामना करना पवा रदा ऐ जेदे करी परिचालन लागत बधी गई ऐ।



PM MKB

प्रधानमंत्री नरेन्द्र मोदी होर आकाशवाणी पर प्रसारित होने आले अपने "मन की बात" कार्यक्रम राहें औंटी 31 मई गी इक्क बारी फही देश-बदेश दे लोकें कन्नै अपने बचार सांझे करडन। एह इस माहवार रेडियो कार्यक्रम दी 134मीं किश्त होग जेहदा प्रसारण आकाशवाणी ते दूरदर्शन दे समूलचे नेटवर्क उप्पर कीता जाहग। एहदे अलावा श्रोता

टोल-फ्री नंबर 1800-11-7800 पर इस कार्यक्रम आस्टै अपने बचार ते सुझास भेजी सकदे न। एह सुझास नरेन्द्र मोदी ऐप या मायगाँव ओपन फोरम राएं बी दिते जाई सकदे न। एहदे अलावा लोक 1922 पर मिस्स कॉल करियै ते मगरा एस.एम.एस. राएं थोए दे लिंक पर जाइयै बी सिद्दे प्रधानमंत्री होरेंगी अपने सुझास भेजी सकदे न। सुझास भेजने दी अज्ज खीरी तरीक ऐ।

Operation Sheruwali

ऑपेशन Sheruwali दे छेमें दिन कल सुरक्षाबलें रजौरी जिले दे डोरीमल इलाके दे घने-जंगलें च छप्पे दे संदिग्ध आतंकवादियें पर हमला कीता। सेना दे जोआनें संदिग्ध आतंकवादियें दी छप्पनें आहली थाहरा गी नशाना बनाया ते भारी गोलीबारी ते ग्रेनेड लांचरें कन्नै हमला कीता। आकाशवाणी जम्मू दे संवाददाता दी रिपोर्ट मुजब इस इलाके च इक कमांडर सनें 2 शा 3 पाकिस्तानी आतंकवादी छप्पे दे न। उत्तरी सेना दे कमांडर लैफ्टिनेंट जनरल प्रतीक शर्मा आसेया कल हालात दी समीक्षा करने मगरा इस अभियान च होर तेजी आई ऐ। सुरक्षाबलें इस इलाके च तलाशी अभियान जारी रक्खे दा ऐ। पिच्छले शनिवारें डोरीमल-गंभीर मोगलान Belt च आतंकवादियें ते सुरक्षाबलें बश्कार गोलाबारी होई ही। कीजे इस इलाके च किश आतंकवादियें दी मौजूदगी बारे खुफिया जानकारी मिलने मगरा इक सांझी टीम नै इस अभियान गी शुरु कीता हा।



GOC- Kathua Visit

Rising Star Corp दे जनरल अफसर कमांडिंग लेफ्टिनेंट जनरल राजन शेरावत होरें बीरबारें पठानकोट (पंजाब) ते जम्मू-कश्मीर दे कठुआ जिले दा दौरा लाया ते खिते च

तैनात बलें दिएं कार्रवाइयें सरबंधी त्यारियें दी समीक्षा कीती। इक सोशल मीडिया पोस्ट च Raising Star Cor नै आखेआ ऐ जे अपने दौरें दरान GoC होरें बलें दी सराहना कीती। आखने जोग गल्ल एह ऐ जे Rising Star Cor कठुआ- साम्बा ते जम्मू जिलें दे किश हिस्सें दे परिचालन क्षेत्रें दी निगरानी करदा ऐ- जेहदे च जम्मू-कश्मीर दा अंतराश्ट्रीय बन्ना बी शामिल ऐ।



MP-CBI Arrest

सी.बी.आई नै Twisha Sharma मौत मामले च गिरिबाला सिंह गी गिरफ्तार कीता ऐ। गिरिबाला Twisha दी सस्स ते सेवानिवृत जिला ते सत्र न्यायाधिश ऐ। गिरफ्तारी कल भोपाल च होई ही। गिरफ्तारी थमां पैहले सी.बी.आई नै करीबन 7 घंटे तगर उन्दे घर पर पुच्छ-पड़ताल ते तलाशी लैती ही। मध्य प्रदेश उच्च न्यायालय नै इक दिन पैहले उन्दी अग्रिम याचिका खारिज करी दिती ही। Twisha शर्मा दी मौत 12 मई गी भोपाल दे कटारा हिल्स इलाके च संदिग्ध हालात च होई ही। इस मालमे च 24 मई गी दिल्ली AIIMS दी टीम नै भोपाल AIIMS च दुआ पोस्टमार्टम कीता हा।



IPL

आई.पी.एल क्रिकेट च अज्ज दुए क्वालीफायर मुकाबले च गुजरात टाइटन्स दा मुकाबला राजस्थान रॉयल्स कन्ने होग। एह मुकाबला न्यू चंडीगढ़ दे महाराजा यादविंद सिंह अंतराश्ट्रीय क्रिकेट स्टेडियम च संजा साइडे 7 बजे थवां होग। इस मैच दी जेत्तू टीम ऐतवारें अहमदाबाद च होने आहले फाइनल मुकाबले च रॉयल्स चैलेन्जर्स बेंगलूरु

कन्ने खेडोग। राजस्थान रॉयल्स नै एंलिमिनेटर मुकाबले च सनराइजर्स हैदराबाद गी हराइयै दुए क्वालीफायर मुकाबले च थाहर बनाई ऐ- जिसले के गुजरात टाईटन्स गी पैहले क्वालीफायर मुकाबले च रॉयल चैलेजर्स बेंगलुरु थवां हार दा सामना करना पेआ हा।

